

Date – 23/10/2025

Time - 18:30 Hrs

HEADLINES (EVENING)

- 1. Mizoram Tipper Association leh Kolasib Joint Action Committee ten Vairengte leh Aizawl inkar kawngpui an dan chah avangin sorkar chuan an member 27 man tawhin Kolasib Police Station ah dah an ni.**
- 2. Nov ni 11-a Dampa Assembly bial Bye Election neih tur atana campaign thawm a ring chho hle .**
- 3. Bihar Assembly inthlan lo awm turah opposition tangrual Mahagathbandhan chuan Rashtriya Janata Dal hruaitu Tejashwi Prasad Yadav chu Chief Ministerial Candidate atan an puang.**

<><><>

NATIONAL HIGHWAY BLOCKADE

Mizoram Tipper Association leh Kolasib Joint Action Committee ten tukin atanga Vairengte leh Aizawl inkar kawngpui siamthat nawr nana kawngpui an dan chah avangin sorkar chuan an member 27 man tawhin Kolasib Police Station ah dah an ni.

Kan Corr hnen atanga thudawn danin kawngpui siamthat nawr nana kawngpui dan chu a hlawhtling hle a, lirthei vei vak an awmlah bakah Kolasib paltlanga lirthei kal an awmla a, Kolasib sumo service pawh wawiin hian an tlan loh bakah sumo counter pawh khar a ni a, zin vei vak hmuh tur an awmla bawh.

Hetihlai hian Kolasib Rengtekawna Kolasib Joint Action Committee duty awm khawm chu Police in an man a, an zinga tel JAC Vice Chairman Pu H. Lalchhanchhuaha chuan kawng tha duh avanga kawngpui dan an rawt chu a hlawhtling hle a ti a, kawng pui tha an neih theih nan na takin an nawr zel dawn tih sawiin mipuiten kawng tha neih an phu tih a sawi a ni.

Pu H. Lalchhanchhuaha chuan hun rei tak chhunga kawng chhia avanga an tawrhna chu a nasa tawh hle a ti a, sawrkar ngenna an zah avanga kawng dan an tum thulh leh an tum lai takin sawrkar atanga vauna an hmu chu an lawm lo hle a ti a, sawrkarin Kolasib District te vau zam mai theiha a ngaih avang leh an nawrh chhan a ngaih pawimawhloh avangin an rilru a na hle a ti a, kawng tha an neih theih nan theihtawp an chhuah dawn tih a sawi bawh.

Hetihlai hian Kolasib District Magistrate chuan thupek chhuahin, Mi tumahin mimal leh pawl, intelkhawm leh inzawmkhawm anga action committee din chawp emaw pawhin state eibar lakna kawngpui Bairabi – Kolasib, Vairengte – Khamrang leh Kawnpui – Durtlang te engvang mahin an dangchat tur a ni lo a ti a. Heng atanga metre 10 huam chhungah Dan lo a mi panga aia tam awmkhawm phal a ni lo a, He thupek hian wawiin atanga thuleh awm hma chuan thla hnih chhung a huam ang.

Kolasib District, Addl. District Magistrate Pi B. Malsawmtluangi chuan Kolasib District huam chhung National Highway kawng chhia avangin lungawilohna lantira kawngpui danchah chungchangah hian theihtawp chhuahin NHIDCL hotute leh contractor te pawhin hma la in siamthat hna an thawk mek a, hetiang theihtawp chhuaha kawng tha lo lai pawh siam a nih mek laia kawngpui danchah tumna chu mipuite tana harsatna nasa tak thlena buaina lian zawk ti chhuak thei a ni a ti.

Kolasib District huamchunga Bairabi – Kolasib highway, Vairengte – Khamrang highway leh Kawnpui – Durtlang BRO, KDA road dan kalha dan chah chu dan kalh a ni a. Ni li chhung Zoram pum ei leh bar lakna kawng dan pin chu mipui te tawrhna nasa tak thlen thei anih avangin mipui him tlanna tur leh harsatna nasa zawk an tawh lohna turin khapna thupek chhuah a ni a ti bawh.

<><><>

CYMA ELECTS

Kum 2025-27 chhunga Central YMA President atan Pu R. Lalngheta, Hlimen Branch chu thlan a ni.

Central YMA Inkhawmpui lian Sakawrdaia neih mekah, vawiin khan kum 2025 atanga kum 2027 inkara Central YMA hruaitu tur thlan a ni a, kum 2021 atanga kum 2023 inkara Central YMA President lo ni tawh Pu R. Lalngheta hian vote tla 3061 atangin vote 1818 hmuin President atan thlan tlin a ni.

Central YMA Vice President atan Prof Lalnuntluanga thlan a ni a, vote 2645 ah vote 2260 a hmu a, General Secretary atan Prof Malsawmliana thlan a ni a, vote 2107 ah vote 1996 a hmu bawk.

Central YMA Assistant Secretary atan S.f. David Ngursangzuala Sailo chu thlan a ni a, vote 1940-ah vote 1162- a hmu a ni.

Vawiina Central YMA hruaitu thlanna hunah hian Treasurer atan Er.H. Duhkima thlan a ni a, vote tla 1975-ah vote 1110 a hmu a ni.

Central YMA Finance Secretary atan Pu M.S Ralte, Upper Republic Branch chu thlan niin vote tla 1872 atangin vote 1094 a hmu a ni. Kan correspondent report I lo ngaithla ang

Vawiina Central YMA Office Bearers tur thlanna neih a President a thlan tak Pu R. Lalngheta hi Hlimen Branch niin, Vice President Professor Lalnuntluanga hi New Capital Branch a ni a, General Secretary a thlan Professor Malsawmliana chu Vaivakawn Branch niin Assistant Secretary Pu SF David Ngursangzuala Sailo chu Dinthar Branch a ni bawk. Central YMA Treasurer atana thlan Er.H. Duhkima chu Dam Veng Branch niin, Pu M.S. Ralte Financial Secretary hi Upper Republic Branch a ni.

Vawiina Central YMA hotu thar thlanna neih zawh takah hian Vice President, General Secretary leh Financial Secretary post te hi hun hmasa lama a ngaiin an la chelh a, President , Assistant Secretary leh Treasurer post ah hian thlan thar an awm thung.

John Vanlalchhuanga, Akashvani News, Aizawl.
<><><>

DAMPA CAMPAIGN

Nov ni 11-a Dampa Assembly bial Bye Election neih tur atana campaign thawm a ring chho hle a,

BJP tana campaign mek, Union Minister Kiren Rijiju chuan Reiek khua a BJP vantlang inkhawm buatsaih ah thu sawiin, Dampa by election lo awm turah, BJP candidate thlan tlin a nih chuan Reiek atanga Lengpui airport lamlian sial rawtna awm chu tih hlawhtlin a nih ang a ti.

Sorkar laipuaia Parliamentary Affairs leh Minority Affairs changtu Union Minister chuan Mizoram chu BJP MLA pahnih chauh nei state ni mahse sorkar laipuaia NDA Sawrkar chuan a enhran loh thu leh inthlanpui lo awm leh turah BJP in sorkarna a chan chuan, Mizoram chu ramchhunga hmasawmna lan thamna state a nih theih thu a sawi a, Mizorama a cham chhunga a hnena rawtna thlen tamtak awm tih hlawhtlin chu Dampa by election-a BJP candidate tlin leh tlin lovah thui tak a inngah thu a sawi bawk. Pu Rijiju chuan Dampa bial mipuiten MLA inthlan an hmachhawn turah BJP MLA an thlan tling a nih phawt chuan sorkar laipui pawhin Dampa bial mipuite chu a bial pum anga kawng tinrenga an puih ve tur thu a sawi bawk.

He hunah hian Mizoram state BJP President Dr K Beichhua pawhin thusawiin, Dampa bialtu MLA Pu Lalrintluanga Sailo hnathawh sa te chhunzawm turin BJP Party chu an inpei a ti a, By election lo awm turah Dampa bial mipuite chu ngaihtuahna seng tur leh BJP candidate Pu Lalhmingthanga Sailo chu Dampa bial mipuite leh sorkar laipui inzawmna atana leihlawn pawimawh tak a nih thu a sawi.

Congress Party pawhin vawiin khan West Phaileng Dinthar Bazar-ah campaign beihpui thlak bul tanna an nei a, He hunah hian MPCC President Pu Lalthanzara chuan thu sawiin, Central Minister rawn tlawhtu 'Centrala Congress sawrkarin Mizoram tan engmah an ti lo' tiin a sawi a, chutih laiin Centrala Congress chu District Council pe tu, UT pe tu leh State pe tu an ni a ti. Congress sorkar chuan Airport, Medical Hospital, Stadium bakah ram hmasawnna hrang hrang a pe tih a sawi bawk.

Mamit Aspirational District chu chawikan duh bik atan Congress sawrkar chuan a lo thlang a, an hnufual vang te, an tihduhdah vang leh hmuh hniam vanga thlang an ni lo a. Dawmkan tura an duh District an nih vang a ni, a ti. An party candiate Pu John Rotluanglian chu hnam tenau te hmangaih tu a ni a, Dampa bial tan pawh an hma nasa taka la thei tur a ni a, an thlan tlin chuan kum 2028 ah NLUP an thlang tling leh tihna a ni, a ti.

Pu John Rotluangliana pawhin thusawiin tun tum bye elction ah hian sawrkar lai ZPM an hlauthawng hle a, a chhan a hmuhchhuah chu he sawrkar ah hian mipui an beidawng em em a ni a ti a. Buhfai man te a let thawkin an tipung a, Congress party chuan an ti ang an tih chu an ti dawn a ni a ti. Dampa bial mipuite MLA nitura kal a ni a, an duhsaknaa thlantlin a nih chuan party thliar lovin tu pawh theih tawp a chhuahsak dawn a ni a ti.

MNF candidate Dr.R.Lalthangliana chuan vawiin khan Lungphun, Hreichuk, W.Lungdar, Khawrihnim, Chungtlang, Rulpuihlim leh Tuahzawlte fangin party hruaitute a kawm a, thlan tlin anih chuan Aspirational District dinhmun atanga khaichhuak turin theihtawpa hmalak a tum thu a sawi a ni. Ni 100 inhlawhna mumal zawka kalpui anih theih nan te, hriselna lamah Dampa bialin hma an sawn theih nan leh bial mipuiin awlsam zawka health clinic an neih theihna tur bakah PHC leh Sub-Centre Staffs indaihlohna phuhruk tura hma lak a tum thu a sawi.

Dr.Thangtea chuan Education Sector-ah thapui a thawh ang a ti a, Education chawikan nan bial chhung school building tihchangtlunna kawngah leh dinhmun tha zawka hlankai ngaite tan hmalak a ni ang a. Zirna lamah hmasawn nan bial chhungah College din theihna awm khuaah College din tura hmalak a ni ang, a ti.

Thlan tlin anih chuan political party thliar lovin khawtinin an mamawh ei bar zawna leh development hrang hrang ngaih pawimawh bikte chu VC/NGO leh party zawng zawngte nen inrawnkhawmna neiin, ruahmanna an siamte chu tihlawhtling turin a hna hmasa berah a neih tur thu MNF official candidate chuan a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

LADC NIELIT

Lai Autonomous District Council ah National Institute of Electronics and Information Technology Centre NIELIT thar, vawiin khan Executive Member - Information & Communication Technology enkawltu, Pu Lalropuia Chinzah chuan a hawng.

Hawna inkhawm, Pu C.Lawmsangzuala, Nodal Officer, kaihhruai ah Pu Lalropuia Chinzah chuan, khawvel ah thiamna nasa taka a than rualin, Information Technology ah LADC chuan hmasawn a mamawh takzet tih sawiin, an mamawh em em sutkian a nihtheih nan NIELIT Study Centre hawn a ni ta chu lamwawm a ti a, NIELIT Study Centre chu LADC Sorkar tan hmasawnna rahbi tangkai leh hlawktak a nih ngei a beisei thu a sawi.

LADC-a NIELIT Study Centre chu a bul tan nan CCC zir nan hman phawt a ni anga, tihchangtluin chhoh zel tum a ni a ti.

<><><>

GRAND ALLIANCE CM CANDIDATE

Bihar Assembly inthlan lo awm turah opposition tangrual Mahagathbandhan chuan Rashtriya Janata Dal hruaitu Tejashwi Prasad Yadav chu Chief Ministerial Candidate atan an puang.Congress election observer leh Rajasthan Chief minister hlui Ashok Gehlot chuan vawiin khan Patna-ah Chief ministerial candidate hi a puang a. Grand Alliance an sawrkar anih chuan Vikasheel Insaan Party hruaitu Mukesh Sahani chu Deputy Chief Minister a nih tur thu a sawi bawk a ni.

<><><>

BIHAR

Bihar Asembly inthlan campaign vanglai a thleng chho tan a. JD(U) President leh Chief Minister Nitish Kumar leh BJP hruaituten hmun hrang hrangah vote zawngin an thawk a. Prime Minister Narendra Modia chuan zanin dar 6 khan BJP-NDA worker te nen an inkawm a. Pu Modia chuan BJP-NDA worker te chuan phur tak leh inpekna nasa tak nen tan an lam tih a sawi a. Bihar Asembly inthlanah hian BJP-NDA ten sawrkarna an siam ngei theih nan theihtawp an chhuah thu social media ah a tarlang a ni..

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 127-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>